



Kalaallit Nunaat naalagaaffinngorusussagaluarpat Kalaallit Nunaat Danmarkilu akunnerminni inatsilerinikkut, politikikkut aammalu aningaasatigut inissisimaneranut tunngatillugu Namminersorlutik Oqartussat Naalagaaffillu peqatigiillutik naatsorsuutigisassanik aaliangeeqatigiinnissaat ilumut isumassarsiatsialaanersoq oqallisissiatut siunnersuut.
(Inatsisartunut Ilaasortaqaq Jens-Frederik Nielsen, Demokraatit)

Demokraatit Inatsisartunut ilaasortaataannut Jens-Frederik Nielsen qujanaq siunnersuummut.

Partiit tamarmik Atassut kisimi pinnani kissaatigaat, nunatut namminiilissasugut. Isummali assigiinneqaat, oqallisigileraangatsigu, qanoq qaqugulu tamanna pissasoq.

2017-imili naalackersuinikkut aqqissuussaanaissaq suliarilersimavarput. Tamanna namminiilivinnissatsinnut qanillisisimava? Naamik. Naalackersuinikkut aqqissuussanermut sulineq tunngaviumik politikkuinnarpoq, partiit annerit atorsinnaasaat qinersisartuminnut oqarlutik, namminiilivinnissamut suliaqarlutik. Taamaaliornikkut naalackersuinikkut aqqissuussaanaissaq pillugu suliaq kinguarsaataannaavoq, taamaattumilluuna, IA aamma Siumut suliaq aammaarlutik kinguarateqperusukkaat. Taamaaliornermikkut taakku partiit oqaluttuassapput, namminiilivinnissamut suliniuteqarlutik. Iluatsitaarineq taanna ersarilluinnarpoq.

Eqqortormi unaammat, namminiilivinnissaq eqqartorneqartillugu, qanorluunniit oqaluttoqarsinnaammat kinguneqartinneqanngitsumik aammalu timitaliisoqartariaqarani. Maannakkorpiaq nuannarineqartorujussuuvoq oqalunneq, Danmark pisussaasoq tapiissutinik tunisijuaannarnissaminut. Aamma nuannarineqarpoq oqassalluni, Free Association-eqassasugut nunat arlaannut. Aammalu nuannarineqarluni oqassalluni, suna tamarmi ajorunnangilaq, namminiilivikkutta naammappoq. Oqinaarivallaarnerupput. Eqqortoq unaavoq, uagut Kalaallit Nunaanni ukiumut ullut tamaasa danskit naalagaaffiat atassuteqarfigisinnaagipput Namminersorlutik inatsisip § 21-ia aallartillugu, naatsumik oqaatigalugu aalajangersaasoq, danskit naalackersuisui Naalackersuisullu isumaqatigiinniarnernik aallartitsissasut Kalaallit Nunaata namminiilivinnissaanut tunngassuteqartumik.

Arlaannaalluunniit. Naleraanngitsoq. Siumukkuunngitsoq. IA-kkuunngitsoq. Arlaannaataluunniit siunnersuutiginiikuunngilluinnarpaa, taamaaliussasugut. Akerlianik asuli utaqqisitsipput imminnut nittarsaallutik oqaaseqartarnermikkut, arlaannaataluunniit iluamik paasisinnaanngisaannik.

Inatsisartunut ilaasortamit Jens-Frederik Nielsenimit uuminnga siunnersuuteqarnikkut aqqutissiuussisoqaralarpoq, qanoq paasissagipput. Danmarkimut naatsorsuuteqarnermut taasisitsinermik aallartisinikkut, paasisinnaalissavarput, qanoq politikikkut, aningaasatigut inatsisitigullu inissisimassanerluta namminiilivittoqarpat. Paasisinnaalissavarput Danmarki namminiilivinnitta kingorna aningaasatigut tapeeqataanissaminut piunmassuseqarnersoq. Paasisinnaalissavarput Danmark qanoq soqutiginninnersoq Free Association-imut imaluunniit allatut suleqatigiinnermut. Danmarkimut



naatsorsuuteqarnermut taasisitsinikkut, ersarinnerujussuanngussaaq, aqqut qanoq takitigissanersoq namminiilivinnissap piviusunngortinnissaanut. Tassa eqqarsarluarluni suliniuteqarneq.

Pissanngatigaara, partit allat qanoq siunnersuummut uunga isummersussanersut. Ersarissorujussuuvoq, siunissamullu isiginissatsinnut piumasaqaateqarluni. Nalornissutigaarali, IA aamma Siumut sapiissuseqassanersut isumaqarlutik, una isumassarsiatsialaasoq oqaatigissallugu. Oqinneruvormi naalakkersuinikkut aqqissuusaanermut suliniut kinguarsartuassallugu, namminiilivinnissap anguniarneranut suliniuteqartariaqarani, qaqillattaaginnarlugu, oqarluni, ilungersorluni suliniuteqarluni nammineerluni naalagaaffinngornissamut.

Tassalu Demokraatit oqallinnermut isummersuutaat.